

Seizlwgnyez Canghraiz Mozwn Denhsinh

Mozwn Denhsinh dwg veiyenz Cungghoz Cozgyah Hezvei, dwg canghraiz ciemie baez daihsam Sanhdungh Swngj Cozgyah Hezvei. Okbanj miz 《Fajfwed》《Ringx Daenggoenz》《Gyoengqde Yingjyangj Le Cungguek: Gojgaeq 75 Boux Gohyozgyah Gunghozgoz (ngeih)》. Haujlai cozbij fatbiuj gwnz ganhvuz 《Lwgnyez Vwnzyoz》《Bouxcoz Vwnzyi》 daengj, deng 《Lwgnyez Vwnzyoz Senjganh》 daengj ganhvuz cienj daeng. Cozbij senj hauej lai cungj senjbonj, youwzyenz vahsaw gyaucaiz, siujhag gyaufuj doegbonj daengj. Ndaej Byadaisanh Vwnzyoz Ciengj, Binghsinh Lwgnyez Vwnzyoz Faenzcieng Moq Ciengj, Gaiq Daih' it 《Lwgnyez Vwnzyoz》 Ginh Gin Ciengj daengj, ndaej 《Lwgnyez Vwnzyoz》 Cib Boux Canghsei Ak Daengx Guek sam baez, ndaej 《Bouxcoz Vwnzyi》 Cozbij Ndei Ciengj song baez. Lajneix dwg aen gojgaeq de lwnh seiz lwgnyez de.

Seiz iq gou couh dwg boux lwgnyez gig caemdingh ndeu. Ceiq caeux daj geij bi hainduj yawj saw, gaenq geiq mbouj cingcuj lo. Seiz-

haenx hix mbouj nyinhrox geijlai cih, gaenbonj cungj dwg youh duenz youh cai, gij cih saedcaih mbouj rox haenx, couh caz sawloih, yienzhaeuh biusij gyoebyaem.

Youq baihlaj gofaexyiz gofaexcauj gyanghongh, gaemdawz bonjsaw ceij bienq henj, couh yienghneix, gij cih baenz hangz baenz hangz hai aen dou ndaw sim boux lwgnyez haenx.

Laeng gou dwg lajmbanj, mbouj miz gij saw lwgnyez cienmonz ndaej yawj, hoeng haemq caijsoq ndei dwg, aenvih daxboh haengj yawj saw, ndigah ndaw ranz miz saw, gou yawj gij saw haenx couh dwg gij saw daxboh.

Moix baez bae dajcunz, gaemdawz gij saw bouxwnq couh yungh rengz yawj, gwn haeux hix sij mbouj ndaej cuengq, ma ranz engq dwg doiq gij saw haenx ndiep mbouj sij vut.

Gij ngaenzlingzyungh daxbuz hawj haenx hix dawz daeuj cawx saw.

Gizsaed gou seiz lij iq mbouj rox gou dwg haengj sij faenzcieng, seizhaenx bohmeuh cungj nyaengq guh reih guh naz, mbouj haeujsim gou yinx



▲ Canghraiz Mozwn Denhsinh (Doz dwg daj gwnz muengx aeudauej).

guh gijmaz. Gou ciengzseiz youq gyanghaemh ndoj youq ndaw denz hai soujdendungz laeglemx yawj saw, yienghneix, doeklaeng da mong dangqmaz.

Menhmenh, doeg saw baenz le sibgveng, yaek ninz gaxgonq engq dwg

aeu yawj saw, mbouj yawj saw ninz mbouj ndaek. Doeg saw lumj gwnhaeux haeujninz nei gag aeu guh youh itdingh aeu guh, gaenq baenz bouhfaenh sengmingh gou, dwg doeg saw gajbienq ciuhvunz gou.

(Lingz Hinghningz hoiz)



Seiziq, gou dwg youq ranz daxbuz majhung.

Geiq ndaej diuz loh boengzhomq iq baihnaj ranz daxbuz haenx dwg dieg guhcaemz seiznyez gou.

Seizhah, non ndaw rum henz loh heuhgitit, ronghrib lumj aen daengloengz nei ronghyebyeb, gou caeuq duz maraiz iq youq ndaw cazhaz, buet bae saet dauq, loengh ndaej aen ndang nem rim gohaz bae. Ngoenz doekfwn, raemxboengz gwnz loh iq biucancan, gumzraemx feuzfit, gou daenj haizfwn, daiq duz maraiz iq dangh raemx guhcaemz, loengh ndaej daengx ndang uq raemxboengz.....Daxbuz mboujdan mbouj ndaq gou, lij cungj dwg riunyumnyum yawj gou. Miz seiz de ing youq gwnz begdou hemq: "Daeg iq mwngz, buet menh di ha....." "Rox lo, rox lo, duzraiz iq, vaiq buet, vaiq buet....." Gou buet ha buet, raemxboengz sinz rim gwnz gavaq, dumz liux bae. Daxbuz riu gou dwg lwgnamhboengz, gou riu duzma raiz iq bienq baenz lwgmaboengz. Maraiz iq angq dwk heuhngaeungaeu hwnjdauej.

Doeklaeng, gou ciemhciemh majhung, diuz roenboengz baihnaj ranz daxbuz siasaet bae lo, diuz roen suijniz saeklamz daengh aen mbwn lamzneuneu haenx, gyaundeid dangqmaz. Diuz lohsuijniz neix geiq miz aen loqsiengj doxdax ci gou.

Ndiengq byaidin, caij hwnj gwnzbenj, gaem dawz ci, bibi buengqbuengq aen ci baenq bae baenq dauq.

Gou youq baihnaj gwih, daxbuz youq baihlaeng rex, maraiz iq youq henz buenx. Ya! Nienj deng gaiq rin iq ndeu, ndwn mbouj maenh, gou lienz vunz daiq ci laemx lo. Vaq gwnz gyauejhoq gou byoengq baenz congh ndeu, in dwk gou bae ndaq ndaek rin haenx. Doeklaeng daxbuz lumj canghguhfae nei, aeu faiq duk gwnz gen caeuq gyauejhoq gou, baujhoh gen gou caeuq gyauejhoq gou mbouj hawj deng sieng. Yienghneix seizbienh ndaej youq gwnz lohsuijniz buetsaet bae.

Doeklaeng, gou hung lo, doeg siujyoz, gou buen bae ndawsingz, lohsuijniz bakdou ranz daxbuz hix yaek siasaet lo, dingq daxbuz gangj, benq dieg neix aeu cek bae, yungh daeuj hwnqguh dietloh, laeb hojcehcan, ngoenzlaeng ndaej naengh hojceh baedauq. Gou cam daxbuz dwg caen lwi? "Caen ha, mwngz gvaqlaeng mbouj ndaej youq gwnz diuz roen neix buet lo....." Daxbuz yawj dwk diuzloh iq baihnaj bakdou haenx, gaem fwngz gou ndaetnig bae, lumjnaeuz aeu gaemdawz gijmaz nei. Vah daxbuz hawj gou doeksaet lix, aenvih ranzmbanj fazcanj gig vaiq, gvaqlaeng gou ndaej miznaj dwk caeuq dahcej Sanghaij naeuz, ranz dou hix miz hojcehcan lo!

Gou gaem fwngz daxbuz dauq hwnjbae, ndaw sim maegdoeg: Daxbuz, loh bienq, cingz mbouj bienq

Daxbuz gaem dawz fwngz gou, naj riunyumnyum ronghsagsag!

(Yinj Swjciengz / raiz Veiz Yennaz / hoiz)

Sawgoj Deng Muedsou

Ngoenzneix, daxmeh bae hwnjban lo, gou gag youq ranz sij cozyez. Cozyez ngamq sij daengz buenq, gou sawqmwh siengj hwnj bonj sawgoj ngamq doeg haidaeuz haenx, daengx uk cungj dwg naemj gij cingzceez ciep roengzdauej de. Swnh ndaw ranz mbouj miz vunz, gou gaem sawgoj okdaeuj, yinxsubsub dwk doeg hwnjdauej. Cingzceez ndaw saw yaep ndeu hawj gou nyaeuq bwnda, yaep ndeu hawj gou riuhaha, mbouj roxnynh sawgoj gaenq yaek doeg daengz satbyai lo.

"Bingjcwngz, cozyez sij sat caengz?" Aenvih doeg ndaej haeujsim lai, gou lienz daxmeh dauqma hix mbouj roxnynh. Daxmeh cam le, gou cijndei simhaw dwk singsaeq han: "Cozyez lij caengz sij sat....." Naj daxmeh sikhaek yiemzsuk hwnjdauej, couh lienz byoemgyaeuj ngauezunq de hix lumj roenx gij feih "ywsiu" okdaeuj, de hozgaek naeuz gou, caemhcai q muedsou sawgoj gou bae.

Begbeg da yawj sawgoj simgyaez deng muedsou, gou nyaenx mbouj ndaej raemxda lae roengzdauej. Hoeng, gou rox gij yunghsim daxmeh, yienghneix gou uet raemxda seuq, nyinhcaen sij cozyez. Seiz gou dawz cozyez gyau daengz fwngz daxmeh, de naj riunyumnyum: "Doeg saw rog goq ndaej hawj raeuz yawj ndaej gyae gvangq, rox ndaej lai laeg, hoeng mboujndaej nguh hagsib!" Daj neix gvaqlaeng, moix baez gou siengj caegcaeg yawj sawgoj, gij vah daxmeh cungj youq henz rwz gou yiengjbyoedbyoed.

(Denz Bingjcwngz / raiz Nungz Cinfung / hoiz)

